

二
知
軒
文
存

二知軒文存卷三十三

定遠方濬頤子箴

戶部左侍郎宋公墓誌銘

濬頤曩官京師十餘年尙意氣好結納交游徧海內而性情相洽終始弗渝古道熱腸可師可法者則莫如雪帆侍郎侍郎長濬頤十歲當甲辰釋褐諸同年咸尊之爲兄而杜筠巢侍郎又偕其兄繼園侍郎與同年十人締金石交侍郎居首予亦得廁其間自是聯轡看花圍爐煮酒文字之會殆無虛日侍郎與此九人者視如手足傾吐肝膈脫略形骸真摯坦

率儕輩萬弗能及之迫己酉濬頤銜恤歸里迭遭大故重以
寇擾家中落淹滯不出者六稔再到春明重荷侍郎與通緩
急予悒悒不自得顧勉之規之以遠大相期倖獲外轉嶺南
距京師七千里則時時函尺一道殷勤不以山川爲阻及量
移兩淮通問尤密碌碌毫無建樹屢欲作歸計以書相商輒
正言止之而於時事艱難政令得失則必舉以相告忠君愛
國之忱與濟困扶危之念蓋無日不往來於胸中當代如侍
郎者有幾人哉嗚呼已矣侍郎今歸天上誰復知予者予爲
侍郎痛更自傷也光緒丙子秋其孤陳壽扶櫬道揚州予往

哭之陳壽持狀乞予爲文志其墓嗚呼予烏能已於言哉按
狀公姓宋氏諱晉字錫蕃號雪帆溧陽人唐時卜居於此自
其八世祖徽明諸生從祀鄉賢九世祖臣熙歲貢生廣東新
安知縣從祀名宦十世以下皆登科第宦於朝高祖陽森妣
氏某曾祖烺妣氏談祖維城妣氏張考緒候選州同知妣氏
史繼妣氏史四世皆以公貴贈光祿大夫妣皆贈一品夫人
公考贈光祿公六齡喪父家故貧妣張太夫人撫一子兩女
饔飧不繼督長女晝夜力女紅以十指佐贈公就外傳讀疊
遇奇荒家益不支贈公乃出依其戚彭氏於長沙隨往湖廣

總督幕府習法家言以嘉慶壬戌十二月二十六日生公兄弟四人公齒居長六歲入塾讀書歸則贈公仍自課之性穎悟過目成誦年十二卽讀完十三經贈公手錄國策史漢文字授公讀益之以魏晉六朝唐宋八家及宋五子書貫申融會下筆成章見者咸推爲偉器贈公由豫章而皖江而金陵諸當道延請無虛日嗣兩江總督濟甯相國孫公聘贈公入幕挈公往公與相國之孫毓澐同讀書卽梧江同年也十九歲應縣試冠軍未及院試丁內艱哀毀骨立服闋應縣試再冠軍補弟子員食餼丙戌相國內召隨贈公就幕於浙繼之

楚公未偕往授徒里中以供甘旨贈公旋丁張太夫人憂遂
不復出壬辰鄉試中副車乙未京兆試報罷遂歸爲負米計
己亥舉於鄉十月贈公棄養盡哀盡禮以營窀穸甲辰成進
士改庶吉士公以忝竊清華祿養未遂秋霜春露輒流涕歛
獻數十年如一日也人咸謂贈公佐相國幕八年陰德所致
故公與相國之孫同登第信非偶然乙巳散館授編修丙午
充順天鄉試同考官丁未大考閱卷大臣列二等十六名進
呈

御覽拔置第四擢中允己酉典試河南以題旨錯誤移咨監

臨奏請議處奉

旨革職留任

宣宗成皇帝龍馭上賓公感

九重特達之知攀號莫及

文宗御極恩詔照例開復處分庚戌遷司經局洗馬充

文淵閣校理本衙門撰文

實錄館總纂壬子大考二等遇缺題奏拜文綺之

賜擢侍講學士充武鄉試副考官癸丑轉光祿寺卿尋署禮
部左侍郎直粵賊陷金陵分股北竄畿輔震動奉 命總辦京

師團防公於是披肝瀝膽竭盡忠讜凡有關於國計民生安危利害知無不言言無不盡極陳各省蹂躪情形籌畫攻剿勝算連劾不職大吏與貽誤戎機者一歲之中章數十上會朝廷屢詔求賢公則悉舉平日所知之鴻才碩德名公鉅卿臚列入告

先帝鑒公之誠俯加采納任以封圻畀以節鉞卒能削平大難戡定東南嗚呼公之所建白者大且遠已甲寅遷宗人府府丞乙卯陞內閣學士兼禮部侍郎銜丙辰陞工部右侍郎充

國史館副總裁

文淵閣直閣事稽察中書科事務公以受恩深重目擊時艱
不忍緘默同塵取容當世雖平居謙卑自牧和易近人而遇
眾議盈廷是非所在則斷然不苟且以軍事因循直言招忤
遂不免有齟齬之者丁巳乙未兩次于役

興京修

陵工庚申

文宗顯皇帝龍馭上賓奉

命恭理喪儀公朝夕入內將事維謹未幾出爲倉場總督先

是河運改爲海運

天庾正供每歲幾三百萬石

欽差部臣駐天津驗收轉運京倉自津門至大通橋三百里內居民藉此爲生沿途偷漏歲必短米一二十萬顧米數甚多補苴尙易癸丑軍興以後江浙郡邑紛紛淪陷南漕起運纔二十餘萬不及從前十分之一而偷漏者如故公至則洞察情弊力加整頓深省倉虧甚鉅而不敢遽發蓋咸豐癸丑以迄同治壬戌十年之間侍郎及監督官凡數易率皆因循粉飾上下相蒙舉發則均干吏議且須賠償米石公誼不忍

爲甘獨任其咎嘗語諸子曰吾居此如卧於積薪之上恐不免貽子孫憂丁卯倉事起吏議綦嚴蒙

恩左遷內閣學士攤賠米至兩萬石之多公設法屏當百計羅掘以補倉虧雖七年不調意豁如也而遇大事則敷陳剴切不避嫌怨謇謇諤諤一如其在

文廟時癸酉

穆宗毅皇帝親政八月

命署吏部右侍郎旋補戶部左侍郎公受

三朝恩遇奮勉益圖報稱職司天下出納軍事未了度支浩

繁時虞匱乏亟思酌盈劑虛主持大計以節靡耗仰屋而嗟
心力交瘁而公遂一病不起矣以甲戌九月十二日薨享壽
七十有三遺疏上

聞

天子震悼 賜祭葬如禮公配陳夫人先公薨造室劉夫人亦

先卒生子三長陳壽陳夫人出直隸邢臺縣知縣次文壽貽壽
劉夫人出文壽工部郎中先卒貽壽刑部主事孫四人曾傳
曾寶曾祐曾順公爲京朝官垂三十年無少長貴賤皆傾蓋
相與周旋人罔不敬公愛公者天性肫摯輕財好施自奉儉

約凡戚黨故舊所求則無弗應其或遠在數千里外友朋凋謝音問闊絕公則耿耿不能去懷於其鄉之官京師者詢之弗得其耗則致書士大夫之官於其鄉者必得其消息而後已山林韋布里閭田野之夫無論識與不識敏門請見公必延之入不作寒暄語卒問曰客何所事有事則已無事則不待其求而已心許之陳壽告予曰先大夫平時訓諸子曰吾生平喜爲人謀尤急人之急往往於力無所顧惜故天之待我亦總無過不去之事生平城府洞開尤樂與人爲善不屑於逆億雖屢爲人欺而待之如故曰吾不逮吾父吾猶知人

之欺我也而甘受其欺若吾父則并不知人之欺己也而卒亦莫肯相欺度量相越有如此者嗚呼予聞陳壽言追思疇曩公之立朝建白卓然有古名臣風舉世以浮詐相矜乃獨視友朋爲性命茲何幸其孤之能追述行誼闡揚先德也嗚呼公有子已將以某年月日葬於某銘曰

公初釋褐主文憲家朝出宣武夜返西華我服公真絕無緣飾跌宕騷壇拍浮酒國羽書旁午乃奮經綸下而推轂上則從繩扈蹕木蘭陳書痛哭弗爲利疚弗爲威怵碩鼠之蠹視爲畏途代人受過公則若愚嗟公豈愚惡彼谿刻履險如夷

心安理得十年偃蹇再掌農曹騎箕而去巫陽下招歸侍
先皇神依

金闕公言不朽公名不沒茫茫人海所見惟公必昌厥後食
報豐隆我文匪諛公論罔異藏之幽宮儀型萬世

湖北布政使厲公墓誌銘

嗚呼濬頤來揚州獲與春明故舊朝夕過從以祛塵俗實爲
幸事乃彈指剎那紛紛宿草傷離感逝無歲無之迄於今日
又遭冕庵方伯之喪腹痛心摧尙何言哉猶憶道光戊申己
酉間公謁選入都與予一見卽相契訂金石交曾不數月公

之清泉予則銜恤歸里音問隔絕迨予在嶺南公已開藩楚
北始通尺一公弟子堅大使需次廣州復得常訊起居顧一
別十餘稔相思彌甚無何公賦遂初而予亦量移兩淮久離
忽合蹤迹彌密春花秋月觴詠流連公之伉爽豪邁不減長
安並轡時予方幸掉鞅追隨長保歲寒之約也丙子正月十
七日視公病於寢室握手欷歔淒然腸斷別才廿日孰意竟
成永訣耶其孤渭青等以狀來乞爲志墓予不敢以不文辭
按狀公姓厲氏諱雲官字伯符又字鳧庵先世爲浙之餘姚
人宋南渡時遷居儀徵遂占籍焉曾祖朝容妣氏李祖長春

妣氏夏晏陳考同勳副榜貢生廣東廉州府知府有合浦還珠之異載府縣志妣氏張繼妣氏張三代皆以公貴贈光祿大夫妣皆贈一品夫人廉州公生三子公居長嘉慶十三年十月二十三日生幼穎敏隨廉州公官京師攻苦弗懈一時名士如建甯張際亮上元許宗衡山陽魯一同同邑吳熙載皆與上下議論爲文字之飲甚歡廉州公出守命公留京師應試連不得志於有司僅以謄錄從事史館廉州公解組歸公過返省侍道光癸卯舉於鄉三上春官不第家中落不得已棄學而仕己酉選湖南清泉縣知縣前令沒於官虧公帑

甚巨故事新舊交替必出具印結上游皆難之公慨然曰某雖清貧終勝伊一籌如數應之上游以此重公聽斷能得其平民罔不悅咸豐壬子粵寇犯順衡州戒嚴羽書絡繹陶文節公方典郡與公共登陴固守衣不解帶者四十日得弗陷先是總督某公駐衡警報迭至某公恐令公具舟揚言將返長沙與撫軍面議軍事公曰此何時也衡爲楚南門戶公一去則衡非我有矣若公云機要八百里急遞可以達於長沙也某公怫然曰非親往不可今夕便行公揣斷不可留乃要之曰公決欲去緩急奚恃請留令箭三枝以備不虞許之遂

行途次得撫軍書曰衡郡儻失舉將誰歸遂廢然而返抵郡
百姓奮臂大呼擲瓦礫如雨下不得入城公復爲從容勸諭
乃得入城守城之日戒諸子曰城存與存城亡與亡臣子之
分也設有不測汝等歸侍祖父母及汝母立志讀書勿墜家
聲他無所屬也以功擢直隸州未幾丁外艱直湘鄉曾文正
公以侍郎督辦鄉團聞公名奏請奪情俾參戎幕乙卯賊欲
取湘潭湘潭爲米船屯集之所文正檄公諭商賈速運米至
省濟軍食而免寇資因星夜往縣令以非出上官視爲具文
商賈亦懷疑觀望而賊氛日熾公曰若再不運行必爲賊有

我當以火箭焚之斷不留以予賊其時勿怨勿悔眾乃行越
日寇大至文正曰無此糧軍立飢潰且稍緩亦無及矣湖廣
總督官文恭公偕湖北巡撫胡文忠公檄公辦理水師饋餉
及軍裝局務二公交相倚畀會文忠營潰水師糧臺駐潯州
遙見火光燭天兵卒駢竄勢岌岌公命放火箭毋爲賊有言
畢湧身投江礮船亟救得免偵知文忠無恙亟往見籌戰守
之策是年丁內艱復爲二公奏留洊擢知府二公偕文正復
疏請以道員記名奉

文廟硃批着以兩湖道員記名以期駕輕就熟洵異數也部

議未經回籍補制者格於例不得補署會鹽法武昌道缺出
二公檄代理遽拜湖南岳常澧道之

命復調湖北荆宜施道兼辦水陸兩路糧臺鄂境遍地皆賊
餉糈奇絀公百計籌畫軍賴以濟洎郡縣次第收復錢糧捐
輸各項文忠欲令徑解糧臺云此乃將士血戰而得者毋庸
循例分解藩庫道庫公持不可曰如此則兩庫爲虛設矣文
忠堅執前說公曰非某不可勢有不合以本省所入之款供
本省之用現所最急者莫如兵餉何不仍循定例分解由糧
臺備公牘支領與解糧臺無異也無已則須先奏明而後敢

收文忠懍然曰君言誠是吾誤矣旣全楚肅清堅請回籍守制二公皆以辦理報銷君手出入無慮千百萬何言歸耶尋署湖北按察使兼攝布政使旋卽眞除文恭有事於黃州奏以公辦理總督事務巡撫嚴公樹森率師出省復奏以公辦理巡撫事務駸駸將大用矣乃同列有忌之者蜚語構陷上聞交文忠查辦事旣得雪公復堅請回籍補制奏入

從之服闋後文正及今合肥相國彭雪琴侍郎先後敦勸出山謂公曰君眞欲高尚不能相助爲理耶公答以心力交瘁竊祿可羞且宦海風波人心難測與其相爭弗如相讓咸懽

然曰難進易退君子哉公性坦夷胸無城府而又嚴重誠篤不苟言笑視天下人皆君子乍見者以爲慄然難犯近而就之則固藹然可親也在官之日杜絕苞苴交友則勿欺然諸事無巨細必敬以將之其訓子曰遇疑難大事不動聲色熟思審慮而後發發必中節是之謂才是之謂識非讀書有得閱歷已深者不能作事固貴乎果決然不矢以小心則鄰於輕率固貴乎暇豫然不操以定見則失之依違惟於經權常變之交準情酌理而出之甯厚勿薄甯拙勿巧甯教人負我不可我負人公有爲而尤能有守曩主餉糈綜覈周至侵蝕

浮冒之弊一埽而空故文忠文正皆深信之嘗謂處腥羶之地兢兢自守不肯貽子孫憂平生所嗜惟籤贍丹青懷勺齋中物予見其大半率皆精妙絕倫足徵巨眼公告子曰所藏皆得之兵燹以後者歸田時囊橐蕭然惟書畫一船而已出崔莊田數十畝以爲祭田六十初度止兒輩稱觴散米貧民自是歲以爲常癸酉淮徐災民流離至邗上予設局捐賑公施棉衣全活甚眾生平於書無所不讀著述多散佚中年始擇可存者弄諸篋笥乃賊至漢口悉燬於火無片紙隻字矣公長身玉立美鬚髯口不言阿堵終日課園丁蒔花種竹以

爲樂與予最莫逆每相遇談必移晷曠達磊落殆今之古人也公卒於光緒二年正月二十八日享年六十有九配史夫人繼配徐夫人亦先公卒側室陳孺人子六人渭青梯青綬青篠青紆青皆徐出復武陳出綬青出嗣胞叔與篠青皆先卒女子四人長殤次適沈次適張次適劉皆徐出孫九人某某將於某月某日與徐夫人合葬於某原徐夫人事行上元許宗衡別爲志墓廵作銘曰

槃槃大才兮未竟厥施愴懷風木兮歸遂孝思眾人所驚兮視猶草芥海闊天空兮無望無礙卅載之交不可爲不久兮

七稔之聚安所得此深友兮躬執紼兮鑾江涯乾坤落落兮
誰與偕勒於貞石兮幽墟是埋萬古不朽兮孰云遺形蛻骸
周家口張勇烈公祠碑

同治五年十二月

記名提督廣西右江鎮總兵捍勇巴圖魯張公樹珊擊賊於
湖北德安之楊家河東岸窮追深入至新家開賊分路衝斷
後隊遂陷賊陣死之今直隸總督合肥相國以
聞

天子震悼命從優議卹加恩予諡其廬州本籍及立功地方

均著建立專祠所有隨同陣亡之將弁並准附祀嗣曾文正公復請於周家口爲樹珊建祠

允之尋

予諡勇烈

賞騎都尉兼一雲騎尉世職七年擒匪蕩平

上追念前勲

賜祭一壇合肥相國疏請

賜宮銜奉

旨加贈太子少保銜時則廬州本籍專祠已建而周家口之

祠至同治十三年始克鳩工庀材公之五弟

記名提督樹屏董其事越明年光緒紀元乙亥九月落成糜金錢若干緡棟宇輪奐廟貌聿新卜吉奉粟主入祠官紳致祭者踴踴濟濟於庭陳之人聞風而至數百里外扶老攜幼踵接肩摩恍若覩風車雲馬之自天而下也淮軍有四曰樹軍曰銘軍曰鼎軍曰盛軍皆起於合肥之西鄉而實則樹軍首爲之倡咸豐三年粵賊入皖

贈光祿公奉有司檄團練鄉兵因命公與伯兄振軒中丞築堡於周公山下之殷家畝峙糧儲械捍衛桑梓而同邑之劉

省三軍門潘晴軒方伯周氏昆仲兩總戎以及董梧岡總戎相與繼之百餘里內互爲聲援賊來則戰去則耕賊近則守遠則出擊閱四五稔西鄉得以晏然無恐固皆公之功也厥初以親兵二十八人爲軍鋒破賊千生禽僞五尙書斬之由是以勇敢著名嗣率練助剿一赴壽春之急再解六安之圍迭克來安無爲潛山太湖霍山三河諸城隘而其勢益振遂應文正之募四軍者皆隸合肥相國部下抵滬上爲規復郡邑計公則有泗涇之戰清浦之戰新涇之戰嘉定之戰四江口之戰福山滾營之戰無錫鼂河渡港之戰江陰鏟壘焚舟

之戰張涇橋破火輪船之戰茅塘橋拊背扼吭之戰亭子橋
一鼓登城之戰戰無不利達於常州東南大局轉危爲安公
之功亦偉矣哉援徐之後復隨文正剿捻北征文正以公所
部爲新軍設四重鎮命公駐周家口扼回竄之賊嚴步伍勤
訓練聯堡寨安居民時豫中連年苦兵甚於苦賊樹軍至則
民皆感之公以逆蹤飄忽無定株守待賊終年未易一遇屢
以追剿請於文正許之鄢陵之役忍飢苦戰卒解徐圍豐縣
之役乘勝急追斬獲無算使賊不得渡運河而東復追賊汝
甯由黃岡以趨棗陽賊悍且眾或致書沮之公以湘淮兩部

休戚相關既爲援師烏可徘徊瞻顧率所部疾進至德安乃
罹於難讀合肥相國疏公死事狀謂有古名臣風所部在淮
軍中人數最少曾求增馬隊三千誓圖滅賊以缺餉未允竊
自愧恨而

朝廷既有忠勇過人之褒文正亦有仁愛惻怛之譽嗚呼公
提步卒四千義氣勃發所向無前南征北征足爲諸軍之冠
不幸捐軀報國淮部主將如失手足各醵千金爲公祠祀卽
鄂豫吾皖諸大府罔不同聲悼惜親往祭奠厚贐以營其喪
正不獨陳之人聞公殉難爲之巷哭紛紛營齋營奠聯名具

牘公請建祠也濬頤雖不得見公得爲中丞之屬吏又與劉
軍門周總戎交習聞公之戰績樂祠之成爰爲表其勲烈而
繫之以詩其辭曰

肥之西鄙無僞官三山峩峩堅壘完大潛紫蓬胥以安追隨
伯仲爲其難知公虢闕兩相國一偏裨耳拔之出以誠待人
得死力攘臂論功公獨默歸田未遂革裹尸濁霧迷漫楚水
湄哭聲震野天地悲袖中乾血猶漬衣公骨已寒名不朽忠
正儀型傳萬口來格來歆薦尊卣僉曰沙河仗公守如公勇
烈有幾人白馬酋遁墮馬呻血性男子迴絕倫吹簫擊鼓歌

迎神

廣東巡撫調署廣西巡撫李公神道碑

封疆大吏以縣令起家者習知民間苦疾地方利害與夫僚屬之賢否政令賞罰之是非得失一旦提綱挈領鼓舞而振興之則如樹表見景操縵成聲往往事半功倍不勞而理焉濬頤承乏監司十餘稔所見者惟山左李公其庶幾乎公與濬頤有三同道光甲辰同成進士同出倉少平師之門同官嶺南顧其先乙未公舉於鄉濬頤則僅中副車迨釋褐登朝濬頤倖入詞館而公則捧檄於外濬頤觀察南韶時公猶

權廣州守曾幾何時公由都轉而臬而藩洊躋開府先治八
閩繼撫兩粵而濬頤則依然以老鹽官自粵之淮不幸於刊
溝舟次哭公之喪傷何如也嗚呼公下世已六年矣適公友
嘉興陳君蒔松欲還浙濬頤延之入幕暇輒與談公往事咨
嗟不已曩未見公狀陳君乃發篋出眎重感齊年交且相隨
幾十稔謹次公生平書於麗牲之碑而爲之銘曰公諱福泰
字星衢濟甯州人高祖學孔以貢生教授鄉里曾祖浩祖萬
松皆有隱德考崐砥行力學屢試不售慷慨持大節里人咸
服之四代以公貴追贈如公官妣張太夫生子二公齒居長

年弱冠補弟子員迨成進士以知縣分發廣東粵俗號難治
贈公訓之曰地方官患不清正清則人畏正則人服畏且服
彼粵民方效順輸誠之不暇何强悍之足云吾族無顯宦而
家世清白祖訓具在汝其勉旃公誌之不忘歷知饒平潮陽
番禺三縣事爲政以安良除暴爲先粵中風氣大都匪強紳
弱公毅然扶正抑邪力去吾民之害遇械鬪案則必緝正凶
誅首惡然後審兩造之曲直而持平以斷案無留牘宰三邑
皆然人心悅服公又以粵民趨利而不知有義欲端民風首
在正士習每見士子輒諄諄於義利之辨勗之以敦品勵行

一時爭自濯磨蒸爲善俗上僚咸倚重之咸豐四年五月東莞會匪何六倡亂於石隆東莞故有巡船素稱敢戰縣令馭之非法遂叛而投何六陷東莞距廣州僅一日程省垣震動公時宰番禺稔知省河巡船與東莞巡船有隙屢在外洋私鬪以之擊賊必得力且不煩征調請於當道從之連戰皆捷七日而復東莞夏杪會匪復四起西則陳開踞佛山鎮北則甘先踞佛嶺市南則陳洸隆陳險涼踞沙灣菱塘各擁眾十餘萬窺伺省垣惟東南鹿步司一路可通薪米入城而其地向有土匪甘陳諸逆族之相應遂成合圍之勢先是有爭水

互鬪案旋息旋鬪民不聊生者已逾廿年公親至其鄉開誠
勸導集紳衿耆老爲之理處民皆罷鬪感公恩恒思效命至
是公乃設局於城外東山寺曉以大義僉曰如公約一鄉通
賊眾鄉擊之以孝廉馬汝泉主其事期於每月朔望會集以
聯官民之氣人心大定賊恚甚急攻之並屯大隊於南海神
廟奪我要隘均爲鄉團擊走之東道不梗轉輸相繼卒得成
功甘先之踞佛嶺市也鄉民從之賊張甚我軍屢挫公招北
路紳士之避亂居城者告之曰賊固烏合焉能成事若子弟
聞多從逆事平皆族矣諸紳愕然問所以自全之策公曰逼

脅爲逆許以自新其速傳諭子弟回鄉勿助賊由官給以保
甲牌先回鄉者註明於牌他日入村收捕凡牌內有名者皆
勿散眾曰唯唯而賊勢瓦解我軍克其巢甘先竄湖南破郴
州復爲楚軍所敗率殘賊三千餘折回鴉湖脅各鄉復起事
無應者當是時公以三千人屯慕德里大府以鴉湖匪多且
罪魁必盡殺公力持不可大府怒嚴斥之同事者咸惴惴勸
公變計公仍持前議謂各鄉之不肯應賊者以先有逼脅勿
殺之言也今若食言鴉湖縱無足惜脫數百村反側各路逆
酋復從而煽之是堅其從逆之心而驅之使合已不遵功令

罪也遵之而變生罪更大不待再計矣徑召紳耆復申前約
予限捕賊無不歡呼用命計先後縛送逆犯三千餘名如僞
元帥甘先僞樞密曹汝升僞五營大將曹春林等咸寘之法
北路肅清鴉湖丁壯萬人胥賴公一言全活之化互鄉爲仁
里焉六年洋人申入城之請當道拒之因而搆讐九月二十
五日洋船闌入省河攻外城城破十餘丈公以米糴實泥沙
塞其缺礮不能入退營海珠臺以開花巨礮向城轟擊晝夜
鼎沸公請於大府募敢戰士四百人駕小艇夜擊之臺高艇
低臺上之礮不能及艇而我艇小礮向臺擊之無不中者十

二月二十三日夜我軍出隊連環轟擊三時之久直抵臺東
勇目關龍率十餘人攘臂先登洋人乃由臺西遁去翌日洋
船退出省河居民安堵是役也官弁出入火光中兩月有餘
公常駕小艇督戰礮數及於頂絕無所傷七年西北兩江有
事兵勇紛紛遣調省中惟林福盛勇九百屯北郭外鄧安邦
勇七百屯東郭外官紳議曰外洋兵退已久可以議和大府
不聽伍某又請勿令入城祇於城外設公所公使來則督撫
出城見之提督來則司道出城見之領事來則守令出城見
之不聽十一月偵知英法兩國合師來犯請增兵不許請調

鄉團不許兩國師船揚帆直駛十一月十三日黎明以大礮轟城步隊六千撲東門鄧勇七百禦之戰甚力自卯至午傷亡過半不退二更入見大府許以撫軍兵八百助戰十四日兵未出而英人已蟻附登陴紳士請議和迄無成說公乃與南海令華廷傑潛約王太常映斗許太史其光林觀察福盛梁孝廉葆訓號召鄉團爲規復計十二月初六日會於石井之蓼采鄉各路來會者數百人是日定議開局於石井傳檄省外十二縣諸大紳皆許之卒以和議格不行八年粵賊石達開由閩竄粵陷嘉應圍興甯總督某調卓興一軍赴援自

駐龍川督師卓軍獲勝解興甯圍賊棄嘉應趨船塘墟去龍川八十里賊眾我寡謀報賊欲犯惠州前廣西按察使張某請制府迅返惠州以顧根本公力沮之制府不能決公進言我軍雖單而賊蹤靡定應伺其動而疾擊之若大軍遽回惠州軍心一搖不可復振賊大股踵至何以禦之乃止逾數月諜報賊走河源一路頭隊先發令卓軍進屯順天湖以截其前何雲章一軍由李田追剿前後夾擊賊大潰竄韶州我軍復蹙之於河賊由連州入廣西同治三年僞侍王李侍賢由江右撲南雄時公已擢廉訪大府奏請以公督辦東北兩江

軍務各軍咸屬焉賊攻南雄不克沿粵邊入閩襲武平永定
進踞漳州僞康王汪海洋踞南靖公督方耀鄭紹忠各軍擊
破之先後收復武平永定以功

賞戴花翎四年正月奉

旨馳赴潮州督辦潮防尋擢粵藩仍治軍事公以嘉應相去
數百里難兼顧請派員分辦嘉防大府不許二月行抵三河
壩賊酋丁太揚全股下竄扼之於楓朗賊竄平和進陷詔安
乃以鄧勇三千營黃岡之分水關禦詔安賊連戰皆捷賊回
竄永定下詔安潮防以固而康逆與花旗林逆兩股已由上

杭之大沽灘渡河入嘉應界方康逆之攻大埔也方鄭兩軍禦之三戰三捷康逆退侍逆復來及侍逆退鄭軍回大沽救鎮平破花旗於慈谿康逆踵至圍之數日鄭軍大創鎮平爲康逆所踞花旗亦由平遠大柘雉雞籠襲踞長樂遂分股踞龍川之赤岡公由潮抵嘉應堅守州城以精銳先清龍長之匪龍長清然後合力以圖鎮平卓軍圍長樂日以大礮轟城賊乞降鄭軍攻赤岡亦乞降許之花旗反正者共四萬餘人方謀安插遣散而康逆爲閩軍所敗由龍南定南走江西遂下鎮平長樂方鄭兩軍出境追剿卓軍移營龍川和平之交

以防回竄嗣鄭軍赴援南雄方耀以追剿不力褫職公所恃者惟卓鄧兩軍卓興又以索餉觸大府怒撤其軍欠餉六十餘萬責令捐輸士卒譁然幾生變而公亦被劾交浙閩總督今湘陰相國查辦疏入奉

旨以道員降補賊旋由龍南回竄連平之下坪墟有爲公畫策者請以軍中實情白相國卽回廣州聽候查辦大局已不支何自苦爲公不答旣而曰惠廣門戶我不可以負人遂督鄧軍兼程進方軍亦繼至擊走上坪之賊賊瞰卓軍旣撤由開道襲嘉應踞之公聞警往援省餉久斷諸軍奔馳窮谷中

掘薯而食冬無棉衣朔風栗烈死亡相繼無退志亦無怨言
相國移師松口檄粵師防西南兩路卽以方鄭兩軍營南口
防西路鄭軍自韶來營長沙防南路閩中江右各軍亦陸續
到防十二月十九日賊撲南口我軍鏖戰賊大潰閩軍乘其
後礮斃康逆餘棄城遁各軍殲之豐順山中嘉應克復粵賊
盪平五年正月至松口謁相國督牧令籌策善後事宜二月
全軍凱旋初咸豐七年冬贈公卒於家公乞奔喪大府奏請
奪情留粵遷延十稔公以軍務告竣請假回籍補制行有日
矣尋奉

旨馳赴潮州辦理中外交涉事宜是年秋復補粵藩十一月
拜福建巡撫之

命由粵入閩途中商民環訴抽釐兩起兩驗共抽四次民不
堪命下車之始首議減釐二成商民稱便偕吳仲宣制府劾
福州延平兩郡守吏治肅然閩俗最惡者火葬溺女二事屢
戒不悛公謂文告之詞未必家喻戶曉因刊小冊萬餘本於
監臨鄉試散卷時人給一冊令回鄉勸諭並商諸在省巨紳
籌欸助葬育嬰民風丕變兵燹後田畝荒蕪賦額久絀前撫
臣奏請清理田賦糧戶慮追舊欠復業者鮮公請以墾復之

年起征舊欠悉予豁免於是逃亡者乃陸續歸業閩省距京師遠公車費不貲以故赴試者寥寥中額日減公爲集巨款僱火輪船載士子四百餘人航海入都七年春闈獲雋者二十二人蓋前此所未有也是年冬調撫廣東公籲懇入覲並重申補制之請得

旨俞允八年入都

陞見後卽回籍持服百日航海抵粵公以粵東風氣漸歸樸厚獨潮州九屬強橫如昔欠課纍纍厯任有司寬嚴未得其當又罕能廉潔自矢以爲民表率者因偕制府瑞麟公奏派

方總兵耀及候補道沈映鈴吳贊誠督率弁兵周歷各邑村莊清釐化導手訂章程八條曰別良歹曰禁需索曰絕械鬪曰散會鄉曰查私抽曰清田畝曰明賞罰曰許自新諳諭官紳實力辦理牧令則簡廉能者撫字催科并行不悖甫及二載閭閻靜謐比戶可封於是

朝廷百十萬正供輸將恐後而水陸諸軍待支餉糈補發無虧說者謂藍鹿洲治潮普兩邑未能如今日布化之速也九年冬調署廣西巡撫公母張太夫人年已八十有三灘河險阻艱於就養公命冢孫世昌侍太夫人居廣州公抵桂林整

飭邊防翦除伏莽減商釐以甦民困裕餉糈以固軍心昕夕講求不遺餘力蓋無異於當日之治廣管也十年三月二十六日薨於位享壽六十有五公原配楊夫人繼配朱夫人咸豐七年洋人入城之變夫人在番禺縣署聞民間訛言投繯殉難請

旌於朝簋室張恭人孔孺人子五家麟候補員外郎楊夫人出先公卒家桂家鳳朱夫人出均殤家玉候選主事加員外郎銜家蘭皆張恭人出女五長適孫次適張三適郭皆朱夫人出四字孫五未字皆張恭人出孫一世昌孫女二均家麟

出公以某年月日葬某

銘曰我筦禺筵步公之後百無一能鉞規是守公治軍旅我
攝公象竭魘將事不匱輪轉公之服官廿有八年奔馳戎馬
遭際迤邐公向我言援枹痛哭一著棋輪致壞全局不戰不
守身爲國辱鯨鯢沸波至今流毒我服公量汪汪若海我服
公行平平如砥我服公才恢恢有餘我服公功謙謙不居名
聞

九重多薦公者蹶而復起公心彌下公之愛民自始至終公
之律己有約無豐同譜一人公掌封圻老母在堂駢鸞奚歸

前李後朱望垂東粵公也繼之民無異說惜乎暮年乃秉節
鉞千秋萬歲請觀此碣

河南巡撫錢公行狀

公姓錢氏諱鼎銘字新之號調甫又號定舫先世由海虞遷
居太倉之湖川塘遂占籍焉四傳至桓前明進士官南贛巡
撫高祖渭曾祖文縻皆太學生祖鳳孫附監生鄉飲大賓父
寶琛嘉慶己卯翰林累官湖南江西湖北巡撫三世

誥贈資政大夫高祖妣氏張氏郁曾祖妣氏楊祖妣氏聞均
誥贈夫人母夫人三皆陳公兄弟二人齒居長道光五年七

二
分
三
月
初
七
日
生
幼
穎
異
有
夙
慧
隨
資
政
公
官
滇
浙
江
楚
閉
戶
讀
書
不
染
貴
介
豪
華
之
習
少
長
卽
留
心
經
世
之
學
於
帖
括
外
取
歷
代
史
鑑
名
臣
言
行
參
觀
互
證
酌
古
準
今
務
爲
有
用
蓋
其
蘊
蓄
者
深
已
甲
辰
補
博
士
弟
子
員
丙
午
舉
於
鄉
先
是
資
政
公
於
辛
丑
引
疾
歸
田
公
日
聞
過
庭
之
訓
所
學
益
進
庚
戌
會
試
報
罷
直
資
政
公
以

宣宗成皇帝升遐入都叩謁

梓宮禮畢卽擬還鄉因其鄉人陳刺史招往冀州避暑乃命
公留京師以

朝廷將考試中書迨六月考取景山官學教習延及仲秋中書尙無試期公遂赴冀州侍資政公南旋咸豐癸丑粵寇陷金陵資政公奉

命辦理團練及勸捐事宜公左右贊襄動中窺要甲寅選贛榆縣訓導乙卯四月之任官廨故湫溢歲久傾圯來司鐸者咸僦屋以居公捐貲修葺之以儒官責在造士凡諸生請業者必勉之敦品勵學寒畯則資以膏火與邑宰分期課試抉擇慎詳泣任數月士論翕然丙辰計偕北上以公之妻弟陸修撰增祥分校禮闈例應迴避不得與試乃援例報捐主事

籤分戶部湖廣司行走丁巳乞假歸省戊午冬復計偕北上
瀕行資政公謂科名有定得失聽之立志爲人勿以庭闈爲
念脫不售庚申試期伊邇不必歸也已未七月資政公捐館
舍公聞赴星奔旋里哀毀幾絕經營喪葬如禮亡何蘇松常
三郡爲粵寇所陷公挈嫜屬避居崇明嗣太倉亦陷吳中官
吏自大府以下皆退保上海蕞爾彈丸三面受敵其勢岌岌
不可終日而

欽差大臣兩江總督曾文正公方駐軍祁門去滬上千里烽
烟隔絕羣議欲轉危爲安非遣一介之使乞師不可於是團

練使者侍郎龐公鍾璐中允馮公桂芬偕致書曰滬上一隅之地關繫大局設再不守則東南半壁無尺寸乾淨土當此之時誼關桑梓爲民請命成敗利鈍固所不計也且資政公遺愛在楚曾營多楚材是役微君孰能肩之公得書卽駕扁舟抵滬上與當道議先籌餉而後乞援乘火輪船由海門入大江江面賊卡林立驚濤駭浪之中火光燭天飛礮如雨同舟者皆變色錯愕公則兀然不動卒達江北至安慶謁文正公備陳江左顛危狀請迅發大兵以解倒懸至糗糧芻茭軍旅所需某躬任之反覆數千言聲淚俱下文正始以瀕海小

邑籌餉綦難思爲持重之計顧聞公言慷慨歔歔激厲士卒
遂允所請今直隸總督合肥相國率淮軍三千人南下水陸
並進公則轉輸餉銀二十萬兩迎師到滬添募壯丁制造軍
械並連和諸將效臂指之助克奏膚公同治初元壬戌奉江
蘇軍營差遣之

命九月以直隸州知州卽選

賞戴花翎癸亥二月以知府分省補用甲子九月擢升道員
加按察使銜並

賞二品封典丙寅八月加布政使銜時合肥相國督辦直東

豫皖軍務命公於袁浦轉運餽餉勤勞備至相國深倚重之
己巳文正移督直隸疏論人才謂公才大心細堪膺重任請
調至畿輔差遣得

旨允行合肥相國方移督湖北公於五月赴鄂面籌善後事
宜適奉補授直隸大順廣道之

命九月抵保陽卽聞所轄地方旱災謁文正請於蒞任後辦
理荒政文正韙之公沿途訪詢民間疾苦接見屬僚議及賑
貸僉以抽辦則易生缺望徧給則艱於籌款且恐鄰屬因之
藉口有礙徵收率遲疑莫決公則謂司牧者目覩旱災瞻徇

顧忌來歲青黃不接之時民生將何以堪遂以仲冬巡閱爲名周歷三郡三十六邑體察實情確知廣平府屬之肥鄉廣宗成安及永年毘連九鄉之數十村莊並大名府屬之大名元城等七州縣旱歉最重寓賑於貸請文正奏撥天津練餉項下制錢十萬以供撫卹十一月擢直隸按察使奏請
陞見得

旨俟畿南賑務辦竣再行來見公遂密飭肥廣等州縣借編查保甲將極貧次貧戶口分別註冊以便來春委員覆查詳定章程刊發春貸票示一律遵行旣而春旱尤甚道署西徧

之龍神祠素著靈異公虔誠祈禱立沛甘霖公書靈貺畢臻
額以答神庥焉捐俸增設大名府義學令校官按月赴塾考
核有秀美出羣者資以膏火改舉節孝章程由學申道請於
大府援卞京兆寶第新章由州縣逕詳督學兩院卽予會題
以免濡滯庚午三月賑務告竣則已奉總督春貸免還告示
張貼通衢頌聲大作公旋入

覲

召見二次垂詢周詳履按察使任而天津民教案起文正奉
命赴津治其事公先上書請調銘字營一軍駐滄州隱爲備

禦厥後天津守令幾罹不測公又力保全之八月擢直隸布政使公家事煩重難了往往延閣吏得因緣爲姦公則分爲最要次要日行三種專委勤幹之員限日清釐積弊爲之一空直隸十年九旱通飭各屬開井種桑大資民利是秋北河漫溢請大府奏撥司庫二十萬金賑被災最重之津靜滄清四州縣其次河間等十三州縣分別撫卹又次各屬酌量蠲緩手定章程十條一嚴覈戶口二慎選紳董三赴津運米官給價值四以銀易錢俾便行用五先期給票以便稽查六擇要設厰以均遠近七留賑欸以備春荒八興工作以資傭趁

九酌給紳董經費十嚴定委員賞罰皆因時制宜實事求是
順德之洛河歲久淤墊公捐廉爲倡集資疏濬全河一律通
暢農商均被其澤尤於用人理財諸大政加意講求凡所甄
拔率皆賢俊清釐州縣交代詳請戶部照給留支並撥抵鈔
票全行蠲免下僚罔不感恩思奮十一月擢河南巡撫因賑
務未竣於壬申二月甫卸藩司任入

覲

召見二次三月

陛辭入都道保陽旬留旬日僚屬餽贐凡二萬餘金悉卻之

四月履任中州道府州縣在省垣需次者凡四百餘人公排日分班接見兩月而畢不特姓名年貌並其性情言行皆能默識而區別之量材器使眾心悅服時固始賊李六陰結捻匪餘黨起事公遣將弁疾馳扼之一戰而潰首要各犯就擒因慮南汝光地方向爲盜藪捻患十餘年始息而廢壘尙多易滋伏莽乃命各州縣毀圩砦嚴緝捕仿直隸章程選綠營馬步驍健者訓練之更定營制厚其餉糈年十五以上二十五以下者乃編入簡樸誠勇敢無習氣之將弁統之先練四營續增爲正副九營分布要隘俾成勁旅更番巡邏如南陽

府屬之除旗鎮馬山口板橋川茅草塢李官橋青華穰東饒
良鎮李青店汝甯府屬之翰東集明港驛斗溝銅鐘寨五溝
營山山店新安店光州屬之淮鳳集黎家集思期集白菜園
皆長年駐巡他如陳州府屬之周家口許州屬之襄城縣汝
州屬之寶魯一帶山中歸德府屬之界連江皖各縣河南府
屬之嵩宜永各山隘陝州之閩靈大道及河北彰衛通衢皆
往來撥隊量其緩急而定多寡巡已卽練練已卽巡兩無偏
廢於是豫南盜賊次第肅清亦仿直隸奏定章程拏獲訊明
卽行就地正法三年殲盜首數百其尤著名者爲滑縣之馬

勞幫仍飭通省州縣力行保甲以清盜源頒發條規令各因地制宜斟酌損益遂爾著有成效興修水利浚賈魯河使通舟楫靳脛河則易名勺金若丈八溝清河餘濟河天然渠永豐渠等處咸施畚揭凡有溝洫之利者七十餘州縣罔不疏通委員勘驗無誤初資政公守歸德日曾於城南開河以資農田灌溉土人號曰錢公渠歲久淤塞幾成平地公以巡閱營伍至歸德紳民請復渠乃倡捐興工兩月而渠復勒碑紀之河北之淇縣河內厥地宜稻居民不解種藝乃仿江浙水車製造頒給新闢稻田二千餘頃爲河北從來所未有軍興

以後倉穀無存厥座坍塌乃仿方恪敏公遺法勸民積穀於城鄉分建義倉有司擇公正紳耆董其事不假手於吏胥計通省積穀九十三萬石荒歉足以爲備州縣私設班館羈押人犯胥吏凌虐死於非命者不知凡幾公則以廉明公正者派司察訪使命相銜互爲糾考而委員之賢否牧令之勤惰勸懲交盡姦蠹莫容已南陽鄧州多溺女之風爲設保嬰局官覓乳媪養嬰五歲仍歸其父母通省皆仿行之省垣孟子祠左建遊梁書院令各省官幕子弟肄業其中巡撫司道府縣輪流月課制藝而外兼及經古優給獎賞拔取真才鄉試

二
分
三
三
人數驟增疏請添派同考官二員並添建號舍數千間士林
尤爲稱頌又以中州多理學名儒令各州縣修葺先賢祠墓
訪求遺集歲時存問其後裔孟津河溢衝齧漢光武陵亟請
於

朝於鐵榭寨添拋石壩以資保固兼於上南中河兩廳黃河
工程加拋十餘壩堵禦急溜山東石莊戶河決巡撫丁公寶
楨駐工親督合龍公助以運糶之船應期而至旋以糶料不
足方欲派員四出采辦公聞之卽委員分赴蘭儀考城等處
幫同購買並將下南廳本年預儲糶料借用一百垛大舸連

檣而下決口卽日合龍丁公以公力顧大局聞於

朝嵩毅兩軍調援甘隴公以道遠提前三月趕解用是數年以來甯夏肅清肅州克復關內盪平公性耐勞遇至難之事殫精竭慮反覆籌維必期於有濟而後已接見屬吏諄諄誠勉以聽斷緝捕徵解三事爲考察闕茸廢弛者立黜之故撫豫三年吏治日有起色甲戌十二月

穆宗毅皇帝龍馭上賓公北向哀號終日涕淚不乾飲食頓減顧體素豐碩理案牘不少休會歸德衛輝所屬生蝗嚴飭撲捕發款收買蝻子解省呈驗仍慮未能淨盡復刊錢蔞士

方伯捕蝗要訣一書頒行各邑重念時事多艱受

恩深重無以報答涓埃憂思過甚火鬱於中遂患瘍證時奏
調總統毅軍四川提督宋公慶回豫駐閩漳一帶控制中原
腹地隱爲深遠之圖疏入

報可及宋軍至潼關而公已寢疾矣五月初三日項右微腫
了不介意眠食如常初七日猶至箭道校射而所患遂劇迫
初九日醫者投補託之劑不效胸膈脹滿四肢如火灼復現
斑疹改投清解之劑少進飲食而病勢屢變二十日自知不
起甫具摺請假而薨享年五十有一公配陸夫人先公卒繼

配陳夫人側室吳氏子二溯耆優廩貢生內閣中書溯時附生皆以軍功加五品銜

賞戴花翎女三長適翰林院編修陸繼輝次適嘉定附生廖壽鏞三適丁卯科副榜汪增懷孫三繹槃溯時出綬槃溯耆出繩槃溯時出孫女一公之遺摺到京奉

旨照巡撫例賜卹

賞溯耆主事溯時舉人嗣河東總督曾公國荃以公當日請師一舉關係東南大局安危疏請將公生平政績宣付史館從之公天性友愛與弟稟銘家居朝夕切磋道義風雨聯牀

怡然至樂及持節中州命猶子溯瀨來署讀書公訓子姪輩
曰士先器識而後文藝立品立身實人生第一要著斯爲善
守先業不在區區詞章記誦之末也尤篤於友朋之誼事無
巨細必爲之盡力圖維故公薨之日遠近聞者咸爲泣下云
資政公與先叔祖采卿公爲己卯同年濬頤久欽德範公之
乞師於文正也至安慶館於南陵徐觀察文達寓所時屆隆
冬公冒雪而來日作包胥之哭義形於色觀察親見之以爲
人所難能也觀察爲濬頤歷歷言之恨不得一見公公撫豫
時有書至意甚拳拳公之匱至揚州濬頤往哭於舟中公子

溯耆溯時持所編公之行述浼觀察乞濬頤作狀謹條次如
左以待世之有道德而能文章者采擇焉

二知軒文存卷三十四

定遠方濟頤子箴

葉辰生墓表

道光丁未曾試濬頤膺分校之役得士十三人乃不二十年
帥逸齋太史殉難江右黃子春太守殉難蜀中而辰生則以
湖南縣令殉難於其鄉里予在嶺南有昔年校士得三忠之
句蓋紀實也逸齋死難事不知其詳予過黃梅訪其孤又不
得見子春則從駱文忠公轉戰入川所向有功奮不顧身遂
罹於難文忠專疏請

卹並撫其事蹟宣付史館獨辰生殉難鄉里僅一見於邸抄
他無所聞也同治甲戌孟春予至吳門辰生之弟薇史明府
來謁詢其兄死難事能言之迨仲秋薇史過邗上告之曰予
與哲兄忝附文字交子盍書狀予將表其墓焉薇史諾之未
幾返吳門而以書抵予並寄狀至按狀君諱維蕃字价人號
辰生姓葉氏松陽人曾祖某祖某父秀發增貢生母包氏生
子二君其長也次維垣卽薇史君幼而穎異十三歲能文章
十八歲補博士弟子員歲科試輒高等旋卽補增食餼壬辰
舉於鄉癸巳丙申應禮部試皆薦而未售戊戌挑取國史館

膽錄癸卯丁母憂哀毀骨立喪葬盡禮丁未成進士以知縣
用分發湖南攝桂陽縣篆才八十日而民感其德有八旬澤
溥兩袖風清之譽繼權黔陽稍久民之誦德者一如桂陽之
民也庚戌丁父憂雞斯徒跣扶匭回里自是家居不出直東
南軍事起在籍以勸捐出力大府奏獎加知州銜咸豐八年
粵匪陷松陽君馳往杭州痛哭乞援於大府發兵剿賊克復
縣城當道咸重君命隨同有司辦理善後事宜十一年賊又
犯松陽君偕處州太守李公希郊督師於東鄉與賊戰我師
不利君與李太守咸罵賊不屈死之君殮時面目如生年甫

五十七歲葬於城東西山卯向迨同治六年浙江巡撫馬公
新貽以事上

聞贈道銜予雲騎尉世職君配毛氏側室傅氏生子二振綸
太學生襲雲騎尉振綸女二長適包次適闕掖史又言家於
城中賊踞城久君之生平著述散失無一存者猶憶丁未揭
曉後君執贄修弟子禮來謁予見君端謹樸慤喜其爲砥礪
廉隅之士一行作吏必能不負所學克底循良乃設施未竟
以憂去官躬際阨危鄉邦多難不圖以孱弱書生慷慨請纓
捍衛桑梓大兵一至蛇豕駘除引重上游駸駸將可大用乃

劫運未完再撷鋒鏑捐軀報國視死如歸君之殺身成仁固與逸齋子春不媿三忠之目也嗚呼今者距君殉難之日已十四年矣何幸得見薇史俾白頭老友泚筆以傳大節而勒貞珉焉九京有知庶幾英靈少慰也歟

汪芝生師墓表

濬頤年十四歲應郡試其時太守爲吾師秀水芝生先生拔置第三院試得補博士弟子員是濬頤之忝竊科名師實導其先路顧以童稚弗獲趨承訓誨垂老徒深仰止之思同治己巳濬頤承乏兩淮筦隄政師之長子龍溪少尹來因留其

襄理淮南書局事溫文爾雅有世家風閒詢吾師生平宦蹟
龍溪黯然曰先府君見背時元魯年才十一弟守愚甫九齡
昏蒙不能繼述抱恨終天僅就當日記憶所及者具狀以丐
表墓之文潛頤受而讀之其狀曰府君諱霖字星南號芝生
姓汪氏爲邑望族曾祖上墳雲南大理府知府祖孟錫吏部
文選司主事少如藻山東督糧道母朱恭人繼母戴恭人府
君以附監生嘉慶辛酉登賢書官內閣中書舍人充

文淵閣檢閱歷任山東濟南府武定府同知權東昌武定登
州府事所至有政聲以大計卓異擢安徽廬州府知府調鳳

陽府知府兼權廬鳳潁兵備道原配朱恭人配顏恭人側室楊孺人生子二府君以道光十一年十一月二十七日卒於官年五十八歲葬於嘉興西鄉之梅家兜母氏皆祔焉府君天性孝友同胞兄弟十一人多早逝每歲必籌千餘金以分贍孤寡族中有不能讀書婚嫁者悉攸助之廉俸所入不敷則減衣損食以行其志治獄仁恕御下寬和待人坦白無城府僚屬有過面折之不少贍徇牧令之有才望者必爲推轂如舒蘇橋觀察朱恕齋方伯周文忠制軍皆府君所薦舉也文忠任宿州以刑尙猛烈言官彈之事下大府按治方急

府君謂除暴所以安良剽悍之俗非嚴厲不足以懲之自周
涖宿強梁斂跡閭閻夜不閉戶信而有徵安得指爲酷吏耶
力以去就爭之大府感悟遂有愛民如子疾惡如仇之考而
文忠由此大用矣鳳陽地瘠民貧偏災時告

朝廷歲有賑卹州縣視爲具文甚至藉口救荒那移他用府
君痛除積弊務期實惠均霑任廬三月卽調任鳳陽六年以
來水旱頻仍府君露冕檐帷僕僕無停晷故全活者眾僉以
爲召父杜母不是過也壽州安豐塘卽古芍陂爲水利要區
歲久隄堰崩蟄府君率屬倡捐不費民財俾復其舊工竣之

日有鶴百餘翔集塘畔居民弋獻其二畜之後堂因顏曰來
鶴云他如定遠之沫河口太平橋皆以次修復至今民賴之
府君並作記勒石以垂久遠境內產穀不多府君見園中桑
陰茂密稔知鳳之人向以織絹爲業欲興蠶桑之利商之觀
察蔡公世松擬各捐數千金往市湖桑且募浙人種藝以事
出創始大府未卽報可而府君適病其議遂寢近來江北各
郡半設課桑局惜府君不及見也辛卯冬霖雨民苦之府君
步禱感寒致不起彌留之際代者爲恕齋方伯來眎疾但以
三邑飢民爲念無一語及家事靈輜南旋過定遠境父老有

泣拜於道左者咸豐元年守愚以縣丞入都驗看道鳳陽留
信宿鄉里聞爲舊使君之子爭來餽問逆旅主人堅不受直
以此見鍾離人情近古抑亦府君之遺愛在民也濬頤乃作
而言曰於虜吾師歸道山已四十年矣先大夫曩與吾師同
官中書有舊嗣以通家之誼交更篤過庭時輒聞先大夫嘖
嘖道太守之賢茫然不解所謂今幸得交令子將有修墓之
役臚陳善政俾操不律以補埋幽之闕而永其傳夫豈獨爲
汪氏光哉凡二千石有志於斯民者咸當引以爲法也

師子岡阡表

嗚呼我顯考榮祿府君以道光二十八年閏四月十二日卒於定遠里第春秋六十有三長男潛頤時官翰林在京師聞赴奔喪八月抵里諸叔父告潛頤曰汝父遺命速葬前年卽以所得師子圖新阡繪圖寄汝汝宜從親志勿遼緩也嗚呼痛哉潛頤敬從府君遺命卜葬於十月十九日並以庶母宋孺人薛孺人兩匱祔於府君之側依形家言午山子向兼丁癸時以期迫弗獲具狀諸叔父曰汝父手訂年譜將來可本之以表於阡忽忽至今二十二年每念音容悲愴靡已惴惴焉大懼府君之嘉言懿行湮沒不傳於世也謹按年譜府君

二知事
以乾隆五十二年六月十一日生甫六歲大母宣太夫人卽
見背大父繼配徐太夫人撫之如己出入歲時讀爾雅至梁
山晉望也請於大父曰成王封叔虞爲唐侯至子燹乃改國
號曰晉爾雅先儒以爲周公作周公時安得稱晉耶大父異
之十七歲補博士弟子員嘉慶戊辰淀津 名試賞舉人

一體會試援例捐內閣中書春闈屢薦不售丙子以復校

高廟實錄獎敘選湖北德安府同知奉大府檄捕獲習天主
教犯三十餘人大府奏獎庚辰入覲奉

旨先換頂戴交軍機處記名五月擢浙江湖州府知府道光

辛巳正月右髀病疽危甚忽一夕夢曾大母陳太夫人坐榻上掖府君身使之外向醒而霍然蓋府君素爲曾大母所鍾愛故有此夢云是年修碧浪湖浮玉塔以閣郡文風所係也壬午長興四安鎮旱災請緩徵大府從之重修右文館拓東西號舍癸未湖州大水烏程歸安長興德清武康五邑皆成澤國巡撫帥公承瀛請賑於

朝府君復勸五邑紳衿富民捐輸以補官賑之不足故事辦賑必報分數吏胥因緣爲姦民不堪命府君廉得其弊破格以全災報駁而復請者再積迂某方伯幾登白簡時張蘭渚

先生家居語府君曰太守愛民吾鄉之福方伯則拘於成例恐干部詰耳盍擇每邑稍近山鄉者區分數以合例餘則概報十分可乎府君如其言事乃解甲申修復長興太湖石塘七十丈有奇樹碑記事乙酉因德清徐蔡氏案以檢驗錯誤罷職戍軍台八月解組都人士繪峴南祖帳圖以揚德政表去思焉丙戌北上至山東桃源以不由驛路詣縣縣令某白諸大府張皇入告奉

嚴旨究治而府君則已先期至兵部矣凡在刑部獄十日部議改戍新疆直回匪煽亂督師揚威將軍長文襄公知府君

之才屬署伊犁將軍德英阿公以府君辦理漢字事件奏入報可時伊犁軍儲不足府君請署將軍奏大營停運以實後路

允之適參贊大臣容安公蒞任府君議廣置屯田修河節費兩帥皆韙之惜不果行冰嶺高寒險滑曩以四城不守徵調稽遲致有履勘改道之

命府君以冰嶺爲適中之地歸化已久他徑則涉步魯特游牧之所野性難馴繹騷足慮乞兩帥據實復奏遂寢其事又以慶祥公殉難回疆請入祀昭忠祠伊犁文武員弁調赴南

路死事者數千人並請入祀皆從之七月四城克復敘功蒙
恩賜環戊子入關歸里時濬頤年十四舉茂才大父母在堂
府君偕諸叔父晨昏侍奉維謹課季父及濬頤讀書教以懸
腕中鋒香光執筆法府君性嗜書每日晨起必至草堂臨元
祕塔五百字求書者戶外常滿府君不以爲苦也壬辰大父
棄養府君年已四十六歲盡哀盡禮戚黨稱之甲午於大母
節孝坊後建支祠奉祀顏曰筠心堂丙申率三叔父重修族
譜丁酉以休甯故里三十三都鄣源村族人有盜葬祖塋事
府君親往族人聞府君將至畏罪將兩棺遷去至則大會族

人祭祠展墓留旬日焉戊戌大母棄養府君已五十二歲哀毀骨立如喪大父時炎暑居廬疽發於背幾殆幸療治得瘥壬寅鄣源遠祖澤三公墓側復有汪姓盜葬兩棺府君請於有司令遷去而不科其罪甲辰濬頤成進士改庶吉士乙巳散館授編修九月

召見詢父年齒濬頤以臣父五十九歲對

宣廟曰汝父年紀不大何以不做官濬頤以檢驗錯誤罷職對

宣廟曰此公罪也濬頤敬錄奏對語上達府君府君感

先皇恩遇屬門下士歸安姚圻繪近光圖紀以二律府君前
在伊江箸東歸日記生還小草歸田後箸蔗餘偶筆古鎔于
齋吟稿撫松書屋唱和詩年譜至六十二歲而止後書自挽
楹帖云時至卽行再休戀身外浮雲天邊朗月知足不辱問
誰似殿前作賦塞上從軍嗚呼痛哉季父告濟頤曰己酉正
月汝四叔父先以疾卒汝父悲惋過甚時覺胸膈脹痛日啜
粥糜初以爲胃弱耳三月宗祠春祭猶扶病成禮嗣日加劇
醫治罔效竟至不起傷何如也濟頤迴憶官京師日府君每
賜書必諄諄以砥行立名爲戒自謂宦海風波屢遭危險幸

而玉關生入事親教子俾得以成名汝當專心致志讀書中
祕能耐清苦久之必晉坊階慎勿違吾訓言別趨捷徑也嗟
嗟言猶在耳予小子知識蒙昧上負提撕乃以給諫轉外臺
碌碌毫無建樹浮沈禹莢者又逾十稔祿不逮養抱恨終天
嗚呼痛哉曾祖諱瑛

累贈榮祿大夫曾祖妣陳氏

旌表節孝

累贈一品夫人祖諱玉達

累贈榮祿大夫祖妣宣氏陳氏

二
年
車
三
不
一
名
三
一
一
累贈一品夫人庶祖妣龐氏

誥贈淑人府君諱士淦字濂舫

誥授朝議大夫

累贈榮祿大夫妣楊氏生妣王氏

累贈一品夫人府君兄弟六人府君居長子四人濬頤妻周氏妾謝氏朱氏周氏謝氏已卒濬孚庠生妻林氏皆卒濬侗候選同知妻陳氏妾徐氏濬復庠生湖南候補同知妻陳氏女二人長適吳次適孫已卒孫八人臻大庠生甘肅平慶涇道臻鵬臻邁臻廣臻進臻德臻高臻善孫女八人曾孫燕昭

選拔貢生曾孫女二人元孫女二人嗚呼我府君一生孝友
忠厚然諾不欺師友之間懃拳肫摯視死如生有古人風年
譜雖略載一二未足以盡之也吾家自大父時卽號素封迨
府君與諸叔父析產分爨亦尙充裕府君則持躬勤儉冠履
不做不易子弟稍染華奢之習卽呵斥之不少寬貸族中有
行止乖禮法者見府君來皆引避遇有爭競之事聽府君一
言而決府君病革日家中兄弟子姝來視疾者環坐堂前屏
息以待不忍去也蓋由府君性情剛正處分家事毫無偏倚
故爲合族所敬服若此濬頤自孩提至授室未離親側我府

君教誨周詳無微不至倖博科名以蒙光顯非仰承厚澤庇蔭烏能以有今日哉濬頤大懼嘉言懿行之湮沒不傳於世也爰詳列世系和淚濡墨並揭於阡光緒元年正月

賜進士出身翰林院編修

誥授榮祿大夫布政使銜加一級兩淮都轉鹽運使男濬頤
表

之字河西阡表

嗚呼道光己酉濬頤奉先府君諱奔喪歸里十月敬安窀穸時先妣楊太夫人多病兩目亦眊昏不能視物幸飲食如常

人米鹽瑣事必躬親不以爲勞也濬頤私冀能得所恃愛日
方長迨庚戌春太夫人以濬頤官京師久債負甚巨屢趣之
出遊爲屏當計濬頤揮淚別母勉強就道孰意馳驅數千里
外不得家中音耗辛亥甫自嶺南歸而太夫人已於庚戌十
二月二十三日棄養矣嗚呼痛哉壬子三月卜葬於之字河
之西阡遵遺命也太夫人爲六安望族乾隆五十三年八月
十八日生年十八歸我府君曾大母大父大母均在堂侍奉
重闈怡聲愉色無忝婦職太夫人以堂上日望抱孫因請之
曾大母勸府君納吾母王太夫人爲簪室生濬頤四歲而王

太夫人卽見背太夫人撫之如己出濬頤兒時體羸善病太夫人鞠育顧復多方調護之嗚呼觀太夫人之待予小子若此卽知太夫人之所以待予母已府君守湖州日太夫人以濬頤鮮兄弟又爲府君納庶母宋孺人生弟濬孚濬侗府君歸田之後太夫人又爲納庶母薛孺人生弟濬復及兩妹太夫人之撫弟妹一如其撫長男也遭翁姑之喪太夫人以冢婦率諸妯娌盡哀盡禮戚黨稱之太夫人主持中饋數十年善權子母雖食指浩繁而量入爲出井井有條從無匱乏府君戍伊江出囊在郡所積朱提四千以爲遠道之需嘗以日

用所贏餘者別置一篋授吾舅氏在六安近郊置田二區癸丑甲寅間粵寇土匪交訐吾家質庫蕩然無存室廬灰燼潛頤將遷居肥上去年甫修家廟營宮室並爲兩弟謀栖止之所慟四弟濬孚早逝以六弟濬侗子臻高爲之後兼爲置屋而卽以六安之田二區歸之太夫人之辛勤居積澤及後人凡我子孫皆當舉以爲法焉濬頤自京師歸太夫人曰吾老矣惟盼汝早得外官俾吾含飴弄孫以娛晚景吾復何憾豈知孟浪遠遊羅此鞠凶兩年之間怙恃均失濬頤遂長爲無父無母之人已嗚呼痛哉太夫人相夫教子俾得成立而不

獲享一日之奉爲子者之心固終其身不能安也濬頤不見
吾母逾廿年令已六十有一已追思往日提攜保抱視衣視
食依依如在日前苟弗稱述懿媿傳之子孫不孝之辜滋大
矣嗚呼痛哉太夫人以府君官湖州知府

誥封恭人以長男濬頤官兩淮鹽運使布政使銜加一級
累贈一品夫人其世系已具於師子岡阡表不再書光緒元
年正月男濬頤表

之字河北阡表

吾邑之西鄉有河焉發源於靈惠橋自南而東至早祥廟折

而之北縈紆遶復匯注於東南形家所謂之旋水也先大父延湖口周先生於家使覓吉壤於此卜穴埋潛記焉潛頤生四歲吾母王太夫人卽見背賴吾嫡母楊太夫人撫之如己出俾得成立十一歲先大夫守湖州因案去官潛頤隨楊太夫人歸里先大父教之讀書潛頤兒時尙不頑鈍先大父鍾愛特甚至十二歲先大父命先四叔父率潛頤奉王太夫人匱卜葬於之字河之北阡壬山丙向時則三月十八日也潛頤雖幼稚猶記畚土成穴時得潛記之輒所書朱文絕不變色穴土純白潔堅細膩無纖毫砂礫周先生語先四叔父

曰如此佳城眞郎君之福也戊子濬頤卽舉茂才而先大夫亦賜環歸里乙未江南鄉試濬頤中副車己亥捷京兆甲辰成進士入詞館先大夫以王太夫人旣安窀穸之後科名顯應若此亟書封墓文刊碑埋於墓側馳書告濬頤誌之勿忘濬頤旣爲先大夫及楊太夫人作阡表因思吾母之阡亦不可無表也躊躇久之四姑母告濬頤曰汝母高郵州人直大水來歸吾家年甫十三侍汝曾祖母陳太夫人性情婉淑動必以禮年十五陳太夫人命爲汝父簪室年十九生汝年二十二卽下世嗚呼痛哉濬頤有祿而不能養吾母有三子四

女一孫兩曾孫女而不能博吾母堂上一日之歡心生我劬
勞昊天罔極尙何言哉太夫人以子濬頤官兩淮鹽運使司
布政使銜加一級

累贈一品夫人光緒元年正月男濬頤表

金匱縣知縣齊梅麓先生墓表

嘉慶十三年

仁宗睿皇帝巡幸淀津多士迎

鑾獻賦

名試行在名列一等第二者爲齊梅麓先生第五則先大夫

皆

賞舉人嗣先大夫守湖州先生已罷宰金匱家於宜興濬頤
兒時竊見先生與先大夫尺一往還兼有酬唱歲時罔閒迨
先大夫歸田之後課濬頤讀書於撫松草堂常爲道先生政
事文章超越儕輩手一編授之曰此我梅麓同年詩也小子
當取以爲法因迴環雒誦出入必置諸行篋尤喜讀紀災書
壁諸詩以爲情真語摯仁人之言雖古循吏弗是過也每恨
無緣侍先生左右一親辟咡且以不得讀先生全集爲憾同
治八年來揚州先生長子學裘由滬上拏舟相訪驩然道故

詢先生全集則歔歔泣下曰板毀於賊家中厪存詩集十六
卷耳遂鈔副本見遺爲之屏當資斧長作寓公與濬頤爲詩
友忽忽七稔已光緒初元仲春學裘持狀眎濬頤曰先公一
生事蹟黃霽青年丈曾爲作傳載於詩集之首而墓碣闕如
學裘年已七十有三深懼遺徽湮沒何以見先公於地下素
稔年丈與先公最爲投分學裘又追逐壇坫久乞吾子念兩
世之交泚筆以光泉壤感且不朽謹按狀先生諱彥槐字夢
樹號梅麓世居安徽婺源縣唐末有蘭公者黃巢之亂捍衛
鄉里父子相繼爵上公遂爲著姓祖松贈奉政大夫父翀進

士官至廣東嘉應州知州贈朝議大夫先生生於乾隆甲午年十月十二日幼秉夙慧七歲卽能文年十四補博士弟子員從姚姬傳先生受作文法弱冠以詩謁隨園老人驚爲曠世逸才以遠大期之人謂沈約之遇王筠也嘉慶甲子以優行貢成均學使山陽汪文端公器之以謂皖中才人讓生獨步戊辰己巳聯捷成進士改庶吉士充

武英殿協修辛未散館以知縣用初選直隸無極縣親老告近改選江蘇金匱縣直大旱創立圖賑法以誠感人輸將踴躍得朱提一十四萬有奇復勸殷戶糴米平糶饑民全活無

算又以賑餘造望亭橋修泰伯墓大府上

聞晉知州秩庚辰以疾得告時祖母曹太恭人母俞太恭人
均在堂公於宜興郭內築雙溪草堂以養親將有終焉之志
道光甲申隄決堰圩洪湖立涸汪文端公奉

命往視南河先生謁文端極言引黃濟運之非上海運議文
端入都告協揆英和公以議上

聞

命兩江總督魏公元煜檄公辦理海運有以盜賊可虞風濤
至險造船費巨用袋貯米咄嗟難辦多方尼之者先生謂吳

淞口迤南由浙及閩粵爲南洋迤北由通海山東直隸及關東爲北洋南洋多磯島水深浪惡可畏非烏船不行北洋多沙磧水淺礁硬非沙船不行洋盜在閩粵斷不能越吳淞以北爭南糧也上海沙船有三千餘號儘敷濟運無須別造沙船舵工熟於水線風信不然富商安肯以多貲造船挾重貨而輕於一擲漂沒間或有之烏得因噎廢食況春夏風濤較穩耶米宜散貯奚以袋爲商賈載豆麥皆然也阻者語塞江蘇巡撫爲陶文毅公悉如所議行是役也用船一千五百有奇運米一百六十三萬三千餘石銜尾而行源源抵天津無

稍阻滯倪失咸服其識之審而謀之臧也卒之功成不居引身而退陶公力勸之出命權蘇州督糧同知勘估吳淞江親督浚治日行泥淖不以爲瘁事竣得

旨優獎以知府候補旋丁母憂遂不復仕先生爲文根柢經術能見其大研究天官家言發鄉先輩梅氏江氏未盡之蘊性巧而通直探微窈嘗製中星儀自動渾儀二器並箸說以示用者又仿泰西水法造龍尾恆升二車其用一車當翻車之五人一當十迅捷奔騰靡有滲漏林公則徐試之於塘塘寬十畝深二尺屨乾七寸視晷甫三刻林公奇之謂有益於

農田水利欲以入告未果先生有龍尾車歌可得其制深明地理謂山有直高有斜高以步弓量之者斜高也以矩度測之者直高也婺源有沖山舊志云三百二十仞先生用矩度墜線倒影測之知爲斜高作沖山記其他經世之文如論開濬吳淞泖湖劉河各事宜復林公問勸民買米說與祭酒程公恩澤論嵯務諸書察覈形勢推勘利病剴切周至無不盡之言惜乎未竟其用也雖退居林下遇有關係於國計民生者未嘗不拳拳於中當道倚之若昏夜之燭指南之鍼先生固不行其道而行其志者歟先生本居婺源梅源山下遂初

之後僑寓荆溪輒歸里創義倉環村種樹引水灌田以救貧
乏修族譜立祠規誼誼於孝友睦婣垂爲訓誠以教族人至
今遵守勿替性好山水笠屐所到輒摩厓題壁酒痕墨汁淋
漓衫袖間自言生平之游至奇至險者如登岱蓋夜作日觀
之游甫及半嶺而雷雨交作山風怒號古木盡拔惶遽間非
遇茅棚嫗接引則危乎殆哉不堪設想矣讀先生紀事詩猶
令人神駭色變或曰先生所遇非人殆元君幻化以拯之也
少時常夢身居江心古寺中自顧儼然頭陀後登焦山海西
庵宛如夢境則先生之根器可知矣交游半天下凡名流才

士以及方外黃冠通一藝者靡不款接同時鉅公長德陶文毅公外如潘榕皋韓桂舲張芥航陳芝楣梁芷林諸大老先生或以尊行或以上官率忘形爾汝傾倒特至先生自視若閒雲野鶴翱翔其間勿以形迹拘也所爲詩元本風雅胎息於杜出入於韓蘇撫時感事有爲而作者居多不屑屑於絺章繪句工駢體律賦官翰林時恭遇

仁宗五旬萬壽進呈擬唐賦十首選入

皇清文穎續編洵儒臣榮遇也其言經濟者亦選入

皇朝經世文編並沈氏昭代叢書精鑒古工八法藏弄旣多

臨樵入化頗得海岳華亭兩家神髓求書者無虛日有句云
退筆如山了無謂老年惟覺苦筋骸自嘲亦紀實也所著詩
古文辭律賦試帖制藝書畫錄凡百餘卷梓行於世又倩錢
梅溪雙鉤松雪墨蹟上石尤爲藝林所寶貴云先生與霽青
太守同出陳玉方先生之門嘗語霽青太守曰漢儒之經非
宋儒之理則不明宋儒之理非漢儒之經則不實又曰窮經
將以致用無用之學非學也先生之持論如此可以覘所學
已卒於道光辛丑六月二十五日享年六十有八葬於溧陽
戴埠鎮馬墩橋配余恭人生子二學變殤學裘府知事繼配

陳恭人生子五學箕學斗皆典史學轍學經參將學楞從九品孫三功成縣丞功災功寶曾孫一成鼇學裘曰先公見背之前一日猶手寫藏書目錄校勘雙鉤墨蹟初無所謂疾病也半月以前卽夢芝楣先生遣价持書延請醒而以告家人至二十五日遂棄養嗚呼痛哉學裘雖老猶將重刊先公詩文集以廣其傳不知天假之緣否濬頤聞學裘之言瞿然以興曰先生爲通儒爲循吏宰金匱入稔廉正愛民頌聲載道至於今六十餘年民之稱齊青天者猶依依如在目前抑何其去思之久耶迴憶昔年先大夫數數道先生並言長公子

之孝實爲世所罕觀今乃益信正月旣爲先大夫先母作阡表而學表不以爲不文復有表墓之請因思吾兩人並皆衰朽追維先德徒切闡揚以君明發之懷增吾風木之感不禁潄潄然淚和墨墮也

贈知府銜候選知縣劉君墓表

山陰劉念臺先生之後裔有遷居吾郡臨淮鄉者字曰驗夫以佐幕於斯遂家焉是爲君之曾祖諱永清者爲君之祖舉茂才蚤世祖妣氏胡守節撫孤諱文鰲者爲君之考妣氏莊奉姑以孝聞君諱景華字松泉嘉慶二十一年六月二十一

日生性至孝幼而岐嶷讀書目數行下十歲能文家貧夜無膏火炷香照字或至曉不輟年十九府試冠軍旋補弟子員食餼丁父艱踰兩載更遭祖妣之喪經營窶生計日蹙不得已出幕於皖案牘之暇習制舉業兼治詩古文辭工八法傅方伯繼勳恆推重之好施予鄉人某喪其親貧無以殮將鬻其妻君聞之傾囊佐助得免道光二十六年丙午鄉試中副車己酉壬子薦而不售就六安幕以道遠迎養母氏咸豐三年粵寇犯吾皖君奮然有投筆請纓之志四年六安陷於賊君奉母避兵武陟山時州牧茅君念劬與孝廉今山東方

伯李君元華謀起鄉兵爲規復計稔君才聘參軍事以母病不忍遠離致書茅刺史爲畫方略連下英霍二邑當事者將上聞君以有老母在未獲躬冒矢石不尸其功固卻之而州之人有倡義籌兵籌餉進攻潛太舒城等邑者君則典衣以應之日讀孫吳殷殷以時事爲念兩江總督馬端敏公方宰合肥與君善共議治兵安民之策往復辨論數千言洞中機宜巡撫福濟公臆之五年夏丁內艱哀毀骨立喪葬盡禮自是而從戎之計遂決矣秦軍門定三提滇黔之師圖下桐城駐梅心驛以禮來聘君攜伯子長芬行至軍中獻策連奪賊

壘所向克捷進營於呂亭驛賊以大隊來攻相持十九日值
歲大旱軍無糧士卒煮革以食危在旦夕軍門集賓僚商進
止僉曰事急矣不退且不支君曰今援兵不至而大敵當前
退則爲所乘無噍類矣夫兵以氣壯將以心堅賊雖多而心
不固勝則聚敗則散易與耳我以孤軍與抗歷十九晝夜而
士無懈志此其機大可用且我軍久饑而敵糧在望若厚賞
死士曉以因糧於敵之義使人自爲戰可以轉危爲安也軍
門然之亟趣戰賊大潰追奔三十里獲米千餘石斬馘數百
營於近桐之五里拐福濟公間於

朝以知縣用七年二月賊勢益衰軍門謂君曰城旦夕可復
君之抱負克舒已君則感激知遇督攻益急亡何踞皖賊酋
僞忠王李秀成以二十萬眾來援絕我軍餉道士困且饑而
賊勢轉張君竟於初二日督隊與戰於板凳嶺力竭死之年
四十有二長芬亦以身殉父端敏入告奉

旨贈知府銜從優議卹給雲騎尉世職入祀昭忠祠君配曹
恭人孝事翁姑治家勤儉生子三人長芬長蔚長英女二人
予與君同郡初不識君君仲子長蔚有才名能世其家吳小
軒軍門延之入幕親見賊氛掃盪足慰其先人在天之靈顧

二知軒文存

卷三十四

三

深痛褻革無從忠骨淪於草莽忽忽廿年之久將葬其衣冠
介小軒以狀抵予乞爲文表之予讀史至明季竊歎念臺先
生以誠教人以忠殉國實爲第一流人物書於本傳之後言
之不盡且長言之而不意二百年後純儒名臣之子孫以書
生殺賊致命疆場之又有其人也嗚呼先生之澤孔長也已
曾文正公祠安主祝文

維我相侯功在社稷哀榮備至式隆廟食矧茲淮海利資廣
斥變而通之民飽其德遺愛弗諼萬口如一祀事孔明歲時
不忒金陵下游控制兩江黃巾蔓延豕突鴟張帷幄運籌我

武維揚指麾巾扇埽蕩機槍大難削平百廢具舉先理漕河
繼及鹽監易綱爲票招徠良賈豫章楚皖循環得所東南旣
定

命治畿輔不才筦轄量移茲土率由舊章罔敢越矩自公北
上民多去思人有所欲天必從之鴻飛遵渚我公歸兮雙旌
南下歡動耄倪昔在玉堂珥筆追隨花輶學步親炙光儀今
依節鉞猥辱青垂凡所咨白首肯不疑方期霖雨永溥四瀆
胡天不弔騎箕太速

詔允建祠康山之麓棟宇旣新虔饌栗木公神有憑公爲民

福以妥以侑俾遂尸祝戔戔衡岳渺渺瀟湘巨浸東流下瀝
淮揚溯洄從之嗚呼不忘千秋萬年其澤孔長敬獻粢牲敬
陳酒漿公靈來格歆此薦薌尙饗

鹽宗廟安主祝文

食重太羹飲先明水祭必齋如反所自始維我賢侯炎帝之
臣肇制鹽鹽以育萬民揚州之域海濱廣斥載在禹貢成賦
咸則束雪量珠比戶所需飲和食德敢忘權輿蠶祀西陵農
祀后稷淡食勿憂我侯功匹奉爲鹽宗山右解池寰宇有記
祖述攸宜往者喬公曾舉斯祀海陵城中雲車戾止迺新廟

貌康山之前祐我商賈利溥懋遷誰其配之曰膠曰管王佐
霸佐功高民顯斲木爲主神所式憑爰修祀事仲秋良辰豫
章楚皖我侯降福俎豆馨香用遂尸祝禮經垂訓崇德報功
明禋永薦敢達神聰尙饗

祭曾文正公祝文

維我相侯鍾靈衡嶽武達文通根於所學天生偉人秉鈞當
軸大難削平東南之福初公釋褐望重蓬山聯翩藻翰翔步
花甌受知詞賦不次超遷容臺晉秩忠讜回天抗疏伏蒲明
堂講席過駕鋒車慎持玉尺金馬之庭蠶叢之域出則囊書

歸而草檄如何桂管欵射欖槍蔓延不治遂及湖湘爰斬荆
棘以捍梓桑奮然投筆一旅勤王公之過人堅忍不拔公之
有容大度豁達公之選將闕虢衝突公之臨民慈祥惻怛撫
綏八皖戡定三吳庸公元老經世宏儒酬庸圭爵贊翊璿樞
久居戎帳口不言劬展布敷施下逮鹽鹽變而通之各得其
所寓網於票式絜於矩大災大役事靡弗舉曰漢武鄉曰明
新建堪與頡頏上膺 寵眷矧在兩淮因利乘便擬諸古
人夫唯劉晏去思長繫廟食允宜康山之麓特起崇祠
朝廷恩渥寰宇名垂雲車風馬瞬息若馳時維仲春涓吉云

祀列俎陳籩割牲薦醴佑我牢盆咸歌盈止來格來歆迓庥
錫祉尙饗

弔李筱峯太守文

嗟天道之難知兮固渺茫而不可憑旣降祥降殃之無或爽
兮奚乃厄夫善人君銜恤而將歸兮予敏以度嶺之辰君曰
江路迂迴兮又中間夫山行虞資斧之匱乏兮願附番舶以
過征予曰風波易起兮矧扶櫬而伶仃君曰航海至速兮奚
憚艱辛予終以爲不可兮再三止君君瞢瞢而予廩廩兮泥
成說以勿更君告予曰無恐兮記連佳者最有名涉鯨濤如

平地兮予聞之而口弗謦君掉舟於黃浦兮予稅駕於金陵
陡傳南澳之變兮云觸礁而遽沈怪君弗聽予言兮冀君儻
遇救而得生僉曰君不至此兮焉有孝子而喪其身初聞母
匱登岸兮果陽侯之降靈聞君拯於魚艇兮得諸申報之所
云顧久焉消息斷絕兮不禁老淚之縱橫船存與存船亡與
亡兮君奮然以身殉親見父之死聳身入海兮孝哉君子培
清同舟之人十四兮出險者乃厘香谷孟庚君捐軀以隨母
兮直抵海濱曹娥負屍同其烈兮信哉軼羣而邁倫君才槃
槃兮君貌恂恂君胸浩浩兮君腹便便君翁與予齊年兮忝

結文字之因相隨七稔兮予則知君最深予倚君幹練兮解
牢盆之紛紜予賴君果斷兮嚴衢市之邏巡予委君以浚河
兮旣奮揭之克勤予任君以課桑兮復董勸之孔殷予有所
疑決於君兮君弗以僞亂真君有所見白諸予兮予遂由昏
得明繫予困君於一隅兮惟君識予之性情君不忍舍予以
去兮甘偃蹇而逶迤予冀君歸葬再出兮家於邗水之濱胡
一別而竟成永訣兮怨彼蒼之不仁以斯而罹此慘酷兮雖
行道皆爲之痛心悵招魂於何所兮驚瀕洞而駭淵齋亂曰
龍伯太虐顯奇孝兮雖死猶生秉懿好兮名達天閭三帥入

告兮伫荷褒旌

恩頒

鸞詔兮神返玉京巫陽下名兮熒熒諸孤兮共撫之戚郇友
朋兮義難辭仰天問君兮知不知雲車風馬兮翩然來降於
斯